



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

ODLUKA
O DAVANJU SAGLASNOSTI GRADONAČELNICI GRADA SARAJEVA ZA
POTPISIVANJE MEMORANDUMA O SARADNJI IZMEĐU
GRADA SARAJEVA, NVO „NAŠA PERSPEKTIVA“ I
SARAJEVSKJE REGIONALNE RAZVOJNE AGENCIJE (SERDA)
(PRIJEDLOG)

Predlagač: Gradonačelnica

Obradivač: Stručna služba za protokolarne poslove,
odnose sa javnošću i međunarodnu saradnju

Sarajevo, juli 2022. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 26. stav 1. tačka 2. i člana 87. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), a u vezi s članom 140. Poslovnika Gradskog vijeća Grada Sarajeva („Službene novine Kantona Sarajevo“, broj 28/09), Gradsko vijeće Grada Sarajeva, na __. sjednici održanoj __. __. 2022. godine, donijelo je:

(Prijedlog)

**Odluku
o davanju saglasnosti gradonačelnici Grada Sarajeva za potpisivanje
Memoranduma o saradnji između Grada Sarajeva, NVO „Naša perspektiva“
i Sarajevske regionalne razvojne agencije (SERDA)**

Član 1.

Ovom Odlukom uspostavlja se saradnja između Grada Sarajeva, NVO „Naša perspektiva“ i Sarajevske regionalne razvojne agencije (SERDA).

Član 2.

Saradnja iz člana 1. Odluke uspostavlja se potpisivanjem Memoranduma o saradnji između Grada Sarajeva, NVO „Naša perspektiva“ i Sarajevske regionalne razvojne agencije (SERDA), čiji je tekst sastavni dio Odluke.

Član 3.

Gradonačelnica Grada Sarajeva ovlaštena je da u ime Grada Sarajeva potpiše Memorandum po stupanju na snagu ove odluke.

Član 4.

Ova Odluka stupa na snagu danom donošenja i bit će objavljena u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:
Sarajevo,

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 26. stav 1. tačka 2. i članu 87. Statuta Grada Sarajeva („Službene novine Kantona Sarajevo“, broj 34/08 – prečišćeni tekst) kojima je propisano da Gradsko vijeće donosi odluke, druge propise i opće akte i daje njihovo tumačenje, odnosno da Grad Sarajevo može pristupati međunarodnim udruženjima lokalnih zajednica i saradivati s odgovarajućim lokalnim jedinicama drugih država, u skladu sa zakonom, te da odluku o pristupanju udruženjima, odnosno ostvarivanju saradnje donosi Gradsko vijeće, kao i u članu 140. Poslovnika Gradskog vijeća Grada Sarajeva („Službene novine Kantona Sarajevo“, broj 28/09) kojim je propisano da gradonačelnica za ugovore iz oblasti međunarodne saradnje mora pribaviti saglasnost Gradskog vijeća, u skladu s Ustavom, zakonom i Statutom.

RAZLOZI DONOŠENJA

Memorandumom o saradnji, Grad Sarajevo, NVO „Naša perspektiva“ i Sarajevska razvojna agencija (SERDA), izražavaju interes za započinjanje saradnje u svrhu poticanja i povećanja direktnih investicija u BiH. Sve tri strane su izrazile želju za formaliziranjem saradnje u cilju davanja potpore investicijama iz dijaspore u Bosnu i Hercegovinu; zajedničke promocije grada Sarajeva kao investicione i turističke destinacije; promotivnih aktivnosti uključujući organizaciju poslovnih susreta investitora iz dijaspore i potencijalnih partnera iz Bosne i Hercegovine; te umrežavanja bosanskohercegovačke dijaspore kroz razvoj održive lokalne platforme koja će dijaspori pružati usluge i olakšati proces investicija.

Osnovne karakteristike poslovnih aktivnosti na osnovu kojih su NVO „Naša perspektiva“ i Sarajevska regionalna razvojna agencija (SERDA), odabrani za partnere u okviru pomenutog Memoranduma o saradnji su sljedeće:

NVO „Naša perspektiva“

NVO „Naša perspektiva“ je djelovala u okviru Projekta „Diaspora Invest“, koji se odvijao pod okriljem USAID-a. Projekat je trajao pet godina, a po njegovom okončanju, NVO „Naša perspektiva“ je kao glavni lokalni partner, naslijedila sve instrumente uspostavljene u okviru tog projekta, rukovodi Biznis centrom bh. dijaspore i platformom Diasporainvest.ba.

Iako je bh. dijaspora u proteklim godinama dokazala da je spremna da pruži svoj doprinos razvoju Bosne i Hercegovine, razvojni potencijal za ovu grupu i dalje je uglavnom ostao neiskorišten. NVO „Naša perspektiva“ prepoznala je da se neangažovanjem ove populacije, u Bosni i Hercegovini propuštaju mogućnosti značajnog uticaja na razvoj. Organizacija i njeni partneri nastoje da osmisle kreativne mehanizme pomoću kojih dijaspora može lakše doprinijeti rastu i razvoju BiH, a koji će intenzivirati protok resursa dijaspore prema zemlji porijekla u cilju njenog ubrzanog razvoja.

U svom dosadašnjem radu, NVO „Naša perspektiva“ izgradila je blisku saradnju sa vodećim bh. organizacijama u inostranstvu, relevantnim vladinim institucijama na svim nivoima, kao i sa drugim domaćim i stranim organizacijama unutar sektora rada sa dijasporom.

U svom radu, organizacija je fokusirana na unaprjeđenje rada sa dijasporom u sjedećim sektorima:

- Investicije: promocija investicija od strane članova zajednice dijaspore u BiH,
- Poslovna saradnja: promocija poslovne saradnje između domaćih kompanija i kompanija u inostranstvu čiji su vlasnici (ili u kojima rade) članovi zajednice dijaspore,

- Zagovaranje: poboljšanje institucionalnog okvira za bolje iskorištenje razvojnog potencijala dijaspore,
- Obrazovanje: povećanje stepena obrazovanosti u radu sa bh. dijasporom kod mladih i odraslih,
- Istraživanje: stimulisanje naučnih i drugih istraživanja u radu sa bh. dijasporom,
- Mladi: saradnja sa mladima iz dijaspore i BiH,
- Inovacije: osmišljavanje kreativnih mehanizama prilagođenih potrebama bh. dijaspore koji će omogućiti lakši protok resursa od strane bh. dijaspore u BiH i vice versa,
- Umrežavanje: pospješivanje aktivnosti koje imaju za cilj umrežavanje bh. dijaspore,
- Partnerstva: kreiranje raznih partnerstava u cilju boljeg iskorištenja potencijala bh. dijaspore.

Ključ i glavni preduslov uspješne saradnje sa dijasporom je izgradnja međusobnog povjerenja te se upravo izgradnja međusobnog povjerenja između bh. dijaspore i BiH proteže kroz sve oblasti djelovanja NVO „Naša perspektiva”.

Sarajevska regionalna razvojna agencija (SERDA)

SERDA je vodeća razvojna agencija u zemlji i nezaobilazan faktor razvoja ekonomije Sarajevske makroregije, te snažan i pouzdan partner u regionalnom ekonomskom razvoju Bosne i Hercegovine. Njena primarna uloga je poticanje razvoja malog i srednjeg preduzetništva u regiji koju ostvaruje: pružanjem finansijske podrške, provođenjem edukacija, razvijanjem poduzetničke infrastrukture, razvijanjem ljudskih resursa, jačanjem konkurentnosti regije, informisanjem i savjetovanjem poduzetnika, pružanjem usluga potencijalnim stranim investitorima i realizacijom različitih međuregionalnih i međunarodnih projekata usmjerenih na stvaranje povoljne poduzetničke klime u Sarajevskoj makroregiji.

Do sada je SERDA realizirala više od 400 projekata iz oblasti poslovnog razvoja, edukacija i standardizacije, zaštite životne sredine, turizma, infrastrukture, podrške malim i srednjim preduzećima, poljoprivrede itd. u partnerstvu sa osnivačima, raznim domaćim institucijama i međunarodnim organizacijama koje djeluju u BiH.

Međuregionalna i međunarodna saradnja vrlo su bitni segmenti djelovanja SERDA-e koja je do sada ostvarila izuzetnu saradnju s raznim institucijama i razvojnim agencijama u inostranstvu (njih preko 500), a posebno u Hrvatskoj, Španiji, Italiji, Švedskoj, Mađarskoj, Austriji, Sloveniji, Turskoj, Srbiji, Crnoj Gori.

SERDA realizacijom svojih projekata djeluje u cilju poboljšanja poslovnog ambijenta na području regije. Uz segment malog i srednjeg poduzetništva i poboljšanje apsorpcijskih kapaciteta osnivača, fokus joj je na unapređenju vještina radne snage u skladu s potrebama tržišta rada, unapređenju turizma, poljoprivrede, zaštite okoliša, održivih izvora energije, evropskih standarda, a uz potenciranje kreativnog i inovativnog pristupa, kako bi se pratio korak sa globalnim ekonomskim tokovima.

Imajući u vidu izrazito veliki potencijal bh. iseljništva u kontekstu njihovog doprinosa razvoju BiH, jačanja privrede, te stvaranja pretpostavki za održivi rast, Sarajevska regionalna razvojna agencija SERDA je u decembru 2019. godine donijela odluku o osnivanju Ureda za ekonomsku saradnju sa dijasporom SERDA. Cilj osnivanja Ureda jeste uspostaviti održiv model za ekonomsko posredovanje između bh. iseljništva i lokalnih interesnih grupa u cilju privlačenja investicija te implementacije razvojnih projekata koji će doprinijeti razvoju privredne djelatnosti u BiH.

SREDSTAVA ZA PROVOĐENJE ODLUKE

Sredstva za provođenje ove odluke se osiguravaju u Budžetu Grada Sarajeva.



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

**MEMORANDUM O SARADNJI
IZMEĐU GRADA SARAJEVA, NVO „NAŠA PERSPEKTIVA“
I SARAJEVSKE REGIONALNE RAZVOJNE AGENCIJE (SERDA)**

Predlagač: Gradonačelnica
Obrađivač: Stručna služba za protokolarne poslove,
odnose sa javnošću i međunarodnu saradnju

Sarajevo, juli 2022. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



**Memorandum o saradnji
između**

Grada Sarajeva, Hamdije Kreševljakovića 3, 71 000 Sarajevo

i

NVO „Naša perspektiva“, Bistrik 52, 71000 Sarajevo

i

Sarajevske regionalne razvojne agencije (SERDA), Kolodvorska 6, 71000 Sarajevo

BUDUĆI DA je Gradu u interesu promocija Bosne i Hercegovine i njenog glavnog grada kao investicione i turističke destinacije te prezentacija projekata stranim investitorima;

BUDUĆI DA „Naša perspektiva“ ima za cilj da pruži podršku izradi strateškog okvira za angažman i investicije iz dijaspore u BiH u saradnji sa institucijama na državnom, entitetskom i lokalnom nivou;

BUDUĆI DA Sarajevska regionalna razvojna agencija pokriva sarajevsku ekonomsku makroregiju i ima za cilj da pruži podršku obnovi ekonomije, stvaranju radnih mjesta i razvoju ljudskih resursa i infrastrukture;

Grad Sarajevo, Sarajevska razvojna agencija i NVO „Naša perspektiva“ usaglasili su se o sljedećem:

Član 1.

Ovaj Memorandum o saradnji (u daljnjem tekst „Memorandum“) zaključuje se između Grada Sarajeva (Bosna i Hercegovina) (u daljnjem tekstu „Grad“), NVO „Naša perspektiva“ i Sarajevske regionalne razvojne agencija (SERDA).

Član 2.

Strane navedene u članu 1. ovog Memoranduma, zajednički su utvrdile da će aktivno sarađivati u sljedećim oblastima:

1. Podrška izradi strateškog okvira za angažman i investicije iz dijaspore u BiH koji bi se uključio u strategiju razvoja i akcione planove Grada Sarajeva;
2. Zajednička promocija grada Sarajeva kao investicione i turističke destinacije; promotivne aktivnosti uključujući organizaciju poslovnih susreta investitora iz dijaspore i potencijalnih partnera iz BiH;
3. Umrežavanje BiH dijaspore kroz razvoj održive lokalne platforme koja će dijaspori pružati usluge i olakšati proces investicija.

Član 3.

Strane će održavati periodične kvartalne sastanke u cilju razmjene ideja i informacija i istraživanja mogućnosti za saradnju na konkretnim projektima od zajedničkog interesa.

Član 4.

Ovaj Memorandum je pravovaljan tokom buduće saradnje (bez vremenskog ograničenja) koji počinje teći od datuma potpisivanja, sve dok jedna strana ne iskaže želju za raskidanjem ovog Memoranduma.

Član 5.

Memorandum je sačinjen u 2 (dva) primjerka, od kojih svaka strana Potpisnica Memoranduma zadržava po 1 (jedan) primjerak.

Za Grad Sarajevo

Datum:

Benamina Karić, gradonačelnica

Za NVO „Naša perspektiva“

Datum:

Armin Alijagić, predsjednik

Za Sarajevsku regionalnu razvojnu agenciju (SERDA)

Datum:

Ševkija Okerić, direktor

IZVJEŠTAJ
O PROVEDENOJ JAVNOJ RASPRAVI NA NACRT ODLUKE O DAVANJU
SAGLASNOSTI GRADONAČELNICI GRADA SARAJEVA ZA POTPISIVANJE
MEMORANDUMA O SARADNJI IZMEĐU GRADA SARAJEVA, NVO „NAŠA
PERSPEKTIVA“ I SARAJEVSKE REGIONALNE RAZVOJNE AGENCIJE (SERDA)

U skladu sa Zaključkom Gradskog vijeća Grada Sarajeva, broj 01-GV-02-773/22 od 27.04.2022. godine, usvojenim na 15. sjednici Gradskog vijeća Grada Sarajeva, održanoj 27.04.2022. godine, provedena je javna rasprava na Nacrt Odluke o davanju saglasnosti gradonačelnici Grada Sarajeva za potpisivanje Memoranduma o saradnji između Grada Sarajeva, NVO „Naša perspektiva“ i Sarajevske regionalne razvojne agencije (SERDA).

Poziv za učešće u javnoj raspravi upućen je 11.05.2022. godine sljedećim subjektima:

- Klubovima gradskih vijećnika
- Komisiji za međunarodnu saradnju Grada Sarajeva kao radnom tijelu
- Nevladinoj organizaciji „Naša perspektiva“
- Sarajevskoj regionalnoj razvojnoj agenciji (SERDA)

Zaključak Gradskog vijeća Grada Sarajeva, čiji je sastavni dio bio i utvrđeni Nacrt Odluke o davanju saglasnosti gradonačelnici Grada Sarajeva za potpisivanje Memoranduma o saradnji između Grada Sarajeva, NVO „Naša perspektiva“ i Sarajevske regionalne razvojne agencije (SERDA), tokom trajanja javne rasprave bio je javno dostupan i na službenoj internetskoj stranici Grada Sarajeva te je tako bio dostupan i drugim zainteresiranim subjektima.

Subjekti u javnoj raspravi, koja je trajala do 26.05.2022. godine, nisu imali primjedbi, prijedloga i sugestija na Nacrt Odluke o davanju saglasnosti gradonačelnici Grada Sarajeva za potpisivanje Memoranduma o saradnji između Grada Sarajeva, NVO „Naša perspektiva“ i Sarajevske regionalne razvojne agencije (SERDA).